

Te Kura Kaupapa Māori o Ngā Mokopuna Hōtaka – Rangi 1, Wehenga 4, 6 Whiringa a Nuku 2025

E te whānau whānui o tō tātou Kura Kaupapa Māori o Ngā Mokopuna, tēnā ra koutou katoa! **Haere atu rā e Hine Takurua, tau mai rā e Hine Raumati!**

E te whānau, anei a tātou whakaritenga, whakahaeretanga hoki mo ngā karakia o te ata, hei mihi atu ki te wahanga kura hou kua tau nei, tēnā tātou!

Anei te hōtaka

Wā	Mahi	Whakamāramatanga	Mā wai
0530 - 0545	Hui tahi ki te kura, he mihi	He whakamāramatanga mō ngā mahi o te ata / rā.	Matua Rāwiri
0600	Ngā Taonga Pūoro Karanga	Ngā reo o ngā Atua - hei reo tuatahi Mana wahine, mana whare tangata Ngā kupu maioha ki ngā whetū, ki te taiao, ki ngā mate, ki ngā iwi/whānau, ki te kaupapa o te wā, ki te taunga mai o te kaupeka hou, ki ngā manaakitanga o te wāhi ngaro ki a tātou te tangata, ki te Aio o te rangi me te whenua e tiaki nei i a tātou te tangata	Tamariki Whaea Muri, ngā kōhine Wharekura Ngā wāhine e hiahia ana
0610	Takutaku #1	He karakia tūhonohono, whakatau, whakakotahi; he momo pure e rere ana	Matua Te Wehi me Te Kāhui Pāpā
	Ngā karakia mā te katoa	Ētahi karakia whānui Ngā waiata tangi (x3)	Katoa, Tirohia ki raro iho
	Karakia ki Tātahi	Whakawhitia te rori kia tohia tātou ki te wai o Tangaroa, ngā wai o Wai Tī, o Wai Tā He karakia whakaū mauri ora ki te katoa Ngā waiata e rua: Tau mai te mauri Purea nei e te hau	Te Kāhui Pāpā
	Hoki ki te Kura	He karakia mā te katoa.	Katoa
	Takutaku #2	He karakia whakakapi, tiaki i a tātou katoa Waiata	Te Kāhui Pāpā
0700	Kai tahi	Parakuihi ngātahi	Ngā mātua
0815	Kua mutu	Kua mā, e whakarite ana mō te Pōhiri ki ngā tamariki hou	E wātea ana ngā whānau
0930	Pōhiri	Tokorima ngā tamariki hou	Katoa
1300	Karakia Whakakapi	Ka mutu te kura hei tēnei wā	

Ngā Whakahaeretanga Takutaku

He Karakia Timatanga

Tuia i runga, tuia i raro, tuia i waho, tuia i roto
 Tuia te here tangata, ka rongo te pō, ka rongo te ao
 Nau mai te ihi, te wehi, te wana, te mana, te tapu
 Poupoua ki roto i tēnei huihuinga
 Ki roto i tēnei whare
 Ki roto i a mātou katoa i tēnei rā

Koia rā e Rongo, whakairihia ki runga
Tūturu ōwhiti whakamaua kia tīna, tīna,
Haumi e, hui e,
Tāiki e!

He Karakia mō te Rongomau

E lo e ... nāu nei mātou i karanga ki ēnei mahi
Meatia ... kia hīkoi mātou i mua i tōu aroaro
Whakaūngia mai tō aroha ki o mātou ngākau
Tōu pono ki o mātou hinengaro
Tōu mārohirohi ki o mātou whakaaro
Nō te taenga ki te tino rangatiratanga
Kia mōhio pū ki te maungarongo
Te rangimārie me te rongomau
Kia tau ki te hau kāinga
Ki te tānga manawa
Haumi e ... Hui e!!
Tāiki e!!

Haere rā e hika

He apakura tēnei nō Ngāti Porou. Kua ngaro te ingoa o te tangata nāna i tito.
He tangi apakura ki ngā tai tamariki o te tātai rangatira.¹

Haere rā e hika, koutou ko ō mātua
Unuhia i te rito o te harakeke,
Ka tū i te aroakapa.
Āku nui, āku rahi e
Āku whakatamarahi ki te rangi e!
Waiho te iwi,
mana e mae noa!

Kia mate ia nei koe e hika,
Ko Atamira te waka, ko Hotutaihirangi e,
Te [ko] Tai-o-puapua, ko Te Raro-tua-maheni e,
Ko Araiteuru, ko Nukutaimemeha;
Ko te waka i hīia ai e
te whenua nui nei!

¹ Kei Ngā Mōteatea (Pukapuka tuarua; #96:6) ngā whakamāramatanga.

E rere rā te motu nei

Nā Muaupoko tēnei waiata i tākoha atu ki te iwi o Parihaka

E rere rā te motu nei
Ki roto kōia o Parihaka
Nā Tohu rā i whakahaere mai ngā tikanga
I tere paepae ai te motu nei
Tō pikitanga kei te Pūrepo
Tō heketanga kei Toroanui
Kia whakarongo koe ki te reka mai o te kōrero
Hei! Hei! Hei!

Mātau tonu au ki a koe e Tohu
E te ngākau whakapuke tonu
Me aha ia rā e mauru e
Ko te hau ka whakamomotu
E whiuwhiu ana
Kei te uru e
Kei te tonga
Ka haramai i roto ka kōharihari
Hei! Hei! Hei!

Taku rākau e

Nā Mihi ki te kapua, nō Ruatāhuna

Taku rākau e
Tau rawa ki te whare;
Ka ngaro a takahi ē.

Te whare o te kahikātoa
Hei ngau whakapae
Hei whakapae ururoa e hau mai nei
Kei waho kei te moana.

Kāore āku mihi ē
Āku tangi mō koutou
Mau puku ko te iwi ē
Ka mōwai tonu te whenua
E takoto nei.

Whakawhitia te rori ki tātahi

He karakia e titia ana, e whakaū ana te mauri ora ki a tātou katoa (Te Kāhui Pāpā)
Ko ngā wai tai ka tohia tātou ki te mauri o Rongo, ki te mauri o Tāne te Wānanga
(ngā tama o te Wharekura).

Waiata #1: Tau mai te Mauri

Tau mai te mauri
Ko te mauri o Rongo
Te mauri whakaaio
Kia wātea te hinengaro
Kia wātea te ara, ki te Toi o ngā rangi
Nau mai Tāne te Wānanga
Hui e , taiki e (x2)

Waiata #2: Purea Nei e te Hau

Ka hoki ki te Kura

He Karakia mō te Tino Rangatiratanga

E lo e, Matua i te Rangi
Tukuna tou wairua mauri ora
Hei tō mātou piringa
Kia pono ai mātou ki ngā whakaritenga
O te Tiriti o Waitangi e tono nei i a mātou
Kia ahuwhenua ki te tiaki i te papa tipua
Kia tūpato mō ngā uri whakatipu
Ko mātou te tangata whenua
Te kaitiaki o ngā taonga tapu
Ko te tino rangatiratanga
Te korowai, ka utaina ki runga i a mātou katoa, ā,
Ka mau tonu
Haumi e, hui e
Tāiki e!

Te Pou (waiata)

Kaea: Te pou, te pou

Te tokotoko i whēnuku
Te tokotoko i whērangī
Tōkia, tukia

Kaea: Ko te mūmū, ko te āwhā

Ko te mūmū, ko te āwhā
Ko te mānihi kai ota
Tākiri panapana
Ka rau i runga, ka rau i raro
Ka whai tāmōre i runga
Ka whai tāmōre i raro

Kaea: Tēnā ko te pou

Tēnā ko te pou
Te pou o Rongo
Nō Rongo, mauri ora
Ka ora eei.....

(Hoki ki te tīmatanga)

Karakia Whakakapi

Mā Te Kāhui Pāpā ngā karakia whakamutunga

Waiata Whakamutunga Poutama

Poutama e...

Nā Tāne-nui-a-rangi piki ake kake ake ki te rangi
Tiki ake i ngā Kete o te Wānanga Tuauri, Tuatea, Aronui e

Whanganui-a-Tara te moana

Hoea tōtika taku waka roto mai i Te Au-a-Tāne,
mai i Te Maraenui-o-Kupe
whiti atu ki Mokopuna motu e!

Anei te whānau o Ngā Mokopuna

Ngā Mataora o rātou mā ngā whītiki o te kī kua huri ki Tāwauwau e

Uia mai koe he aha rā te hiringa o tōku kura

Ko Te Aho Matua te tāhuhu o tōku whare,
Ko te reo me ōna tikanga ngā heke whakamau,
Ko te Whānau te whanaungatanga ngā pou

Tihei

Mauri ora!

Te Aho Matua

1.1 Nō ngā Rangi Tūhāhā te wairua o te tangata. I tōna whakairātanga ka hono te wairua me te tinana o te tangata. I tērā wā tonu ka tau tōna mauri, tōna tapu, tōna wehi, tōna iho matua, tōna mana, tōna ihi, tōna whatumanawa, tōna hinengaro, tōna auahatanga, tōna ngākau, tōna pūmanawa. Nā, ka tupu ngātahi te wairua me te tinana i roto i te kōpū o te whaea, whānau noa.

1.2 Tino motuhake ēnei āhuatanga katoa. Ko tēnei hoki te kākano i ruia mai i Rangiaātea. E kore ia e ngaro. Engari, ko tā ngā mātua, ko tā te whānau, ko tā te kura hoki, he mea awhi, he mea whāngai, he mea whakaako i te tamaiti kia tupu ora ai tōna katoa i roto i te tika me te maungārongo.

2.3 He taonga te reo Māori i roto i te Tiriti o Waitangi, he reo tūturu hoki i roto i te Ture mō te Reo. Engari kāhore he painga o te Tiriti, o te Ture rānei, mehemea kāhore te reo i roto i te whatumanawa, i roto i te ngākau, i roto hoki i te māngai o te iwi Māori.

2.4 I runga i tēnei whakaaro, kia tere pakari ai te reo o ngā tamariki, me whakahaere ngā mahi katoa o te kura i roto i te reo Māori. Tae atu ki te hunga kuhu mai ki roto i te kura, me kōrero Māori katoa, i ngā wā katoa.

2.6 E tika ana, mā te hunga tino mōhio ki te reo Māori, ki te ao Māori hoki, e ārahi ngā tamariki i roto i a rātou mahi. Engari kia tika anō te ngākau me te wairua o tēnei hunga, me whakapono hoki ki te kaupapa whānui o ngā Kura Kaupapa Māori. Heoi anō, me whai aroha tonu te hunga o te kura ki a rātou kāore anō kia tino pakari te reo. Mehemea he tangata tautoko i te kaupapa, āwhinatia. Mehemea e tino ngākau nui ana ki te reo, a tōna wā ka mau.

3.4 Kia mōhio ngā tamariki ki ngā rohe, ki ngā waka, ki ngā kōrero neherā, ki ngā pūrākau, ki ngā pakiwaitara, ki ngā tikanga, ki ngā waiata, ki ngā āhuatanga katoa o tōna ake iwi. Kia mōhio anō ki ngā āhuatanga katoa e pā ana ki ērā atu o ngā iwi, tae noa ki ētahi o ngā iwi o tāwāhi.

3.6 Mā te rongo a te tamaiti ki te awhi, ki te arataki, ki te tautoko, ki ngā tohutohu a te whānau me tōna aroha hoki, e mau ai tōna piripono ki te whānau. He mea hopu te nuinga o ēnei tūāhua. Nō reira, e tika ana kia piri tonu te whānau ki ngā tamariki i roto o te kura, i roto i a rātou mahi hoki.

3.8 Kia kite ngā tamariki ko te whānau tonu e whakahaere ana i te kura, ko te whānau hoki e mahi ngātahi ana me ngā pouako, ka tupu ia me te mōhio ko te wairua me te mana Māori motuhake e kākahu ana i a ia me tōna kura.

3.9 Ehara i te mea mō ngā tamariki anake te kura. He mātauranga anō kei te kura mō ngā taipakeke, mō te katoa o te whānau hoki mehemea ka hiahia whakatū wānanga rātou mō rātou.

4.1 Ko tōna ake kainga te ao tuatahi me te kura tīmatanga o te tamaiti. Tua atu o tēnei ko te ao Māori. Mā te Kura Kaupapa Māori ia e ārahi i roto i ēnei nekeneke tae noa ki tōna kura whakamutunga, arā, ki te ao whānui me ōna āhuatanga katoa.

4.3 Hāunga tērā, ko te tīmatanga tika mōna, ko te whai haere tonu i ngā kōrero tuku iho a ngā mātua tūpuna e pā ana ki te tīmatanga o te taiao.

4.4 Kia whai koha ngā tamariki ki a Papatūānuku rāua ko Ranginui me a rāua tamariki e tiaki nei i te hā o ngā moana, o te whenua, o te rangi me ō rātou āhuatanga katoa.

4.5 Kia tupu te mīharo o ngā tamariki ki ngā mea ora, ki ngā mea tupu katoa. Kia kaua e tūkinotia.

4.6 Kia tupu ngā tamariki hei kaitiaki i ngā painga huhua o te whenua, o te moana, o ngā ngahere. Kia mau hoki ki ngā ture tuku iho a ngā mātua tūpuna, e pā ana ki te moana, ki te whenua, ki ngā ngahere.

4.7 Kia whaia anō e ngā tamariki ngā ture o te ao, otirā ngā pūtaiao e pā ana ki te moana, ki te whenua, ki te rangi, ki ngā mahi tātaiai hoki.

- 5.1 Ko ngā āhuatanga ako katoa he mea mahi i roto i te koanga ngākau, me te whakaihiihi hinengaro.
- 5.2 Ko te tino painga o te karakia he mea whakatau i te wairua, whakawātea i te whatumanawa me te hinengaro, whakarata i te ngākau, whakataka i ngā raru, kia ngāwari ai te whakauru atu ki te mahi kua whakaritea hei mahi.
- 5.3 He mea whakaihiihi i te tamaiti te noho o te pakeke ki tōna taha hei toko mōna i roto i āna mahi. Heoi anō, ko te awhi ko te tautoko i a ia. Engari kia kaua e riro mā te pakeke e mahi te mahi a te tamaiti.
- 5.4 He mea nui te noho wahangū me te whakarongo mō ngā tamariki. Mā te mau o tēnei tūāhua e rongō ai ngā tamariki ki te hōhonutanga o te kōrero.
- 5.5 He mea tāpiri atu ki te whakarongo, ko te titiro, ko te raweke, ko te makamaka pātai, ko te whitiwhiti kōrero, ko te āta whakaaro, hei whakauru i te mātau me te aroā.
- 5.6 Ko ngā kaumātua ngā kaipupuri o ngā tikanga Māori, ko rātou hoki ngā pū kōrero. He mea nui tērā kia piri mai rātou ki te kura, ki ngā tamariki hoki hei kaiako, hei kaiārahi.
- 5.7 He mea nui tērā te manaaki tangata. Kia kite ngā tamariki i te āhua o te manaaki, i tōna kainga, i te kura, i te marae. A tōna wā kia tū rātou ki te āwhina i ngā mahi manaaki.
- 5.10 He mea tino nui te wāhi ako hei whakaohoho i te wairua o te tamaiti ki āna mahi whakaako. Nō reira, kia kikī tonu te kura i ngā mea whakaihiihi i a ia, i ngā mea pupuri hoki i te hā o te ao Māori. Me whakawhānui hoki tōna wāhi ako ki ngā marae, ki ngā ngahere, ki waenga pārae, ki te taha moana, ki ngā wharepukapuka, whare taonga me ērā atu whare whāngai i te puna o te mōhio.